

## Piou e-neus laz et an hini koz ?

**Darvoud - polis,**  
bet skignet gand Radio-Kimerh  
d'an 3 a viz meurzh 1957.

### I

#### Lagadeg

*(o komz en telefon )*

Alo ! Ya. ar homiser Lagadeg ? Me va-unan ! Piou ? Sekretour an ti-kêr e Landergad ? Ha petra nevez a zo ganeoh ? Eun droug-laz ! O ! O ! Piou a zo bet laz et ?... Mestr Kerdreñket ! E peleh ema Kerdreñket ? A, mad-tre. gweled a ran... Ya. dioustu. A-benn ugent munut. Gortozit ahanon ha na leuskit den ebed da dostaad ouz ar horv. Nag ar vugale kennebeud ! Den ebed. An oll draou evel m'emaint. Kenavo dioustu ! *(Geruel a ra eur polis. )*

Lousouarn, c'hwi a deuio ganin da Landergad, ha prim. Eun den koz a zo bet laz et, sur a-walh, e Kerdreñket. Kerzit buan da glask ho kamalad Gwivarh, hag ho-taou en oto, dirag an nor... Prim tenn !

Hum ! Eun den koz, eur mab ha diou verh, eun tiegez pinvidig, n'eus bet laeret netra. Petra 'zo c'hoarvezet ? Eom da weled !  
*(Trouz an oto o vond kuit. )*

### II

*(E Kerdreñket)*

#### Lagadeg

Lousouarn ha Gwivarh, chomit a beb tu d'an nor ha mirit ouz pep hini da dostaad. Me am-eus evid eur boutadig amzer gand an dud-mañ. Ma tegouez an aotrou Mêr, e kasoh kelou din dioustu. A ! Gwelom penaoz e

vo diluziet ar gudenn-mañ ! Piou e-neus kavet ar horv, da genta ?

**Lom**

Me. O tistrei deuz ar park gand eur harrad melchon.

**Lagadeg**

Piou oh-c'hwi ?

**Lom**

Lom ar mab koz. An diou-mañ a zo va hoarezed, Gaid ha Naig.

**Lagadeg**

Bez' ez eus tud all en ti ?

**Lom**

Den all ebed.

**Lagadeg**

Na bugale ?

**Lom**

Na bugale. N'on ket dimezet, na va hoarezed kennebeud.

**Gaid**

Talvezoud a ra ar boan dimezi, p'eo ken fall ar baotred ?

**Naig**

Ha kaoud bugale evid gouzañv beb seurt dismegañs diganto, eur wech m'int deut braz. Evid selvij dezo da vatez e-pad ar vuhez penn-da-benn. Ar gwella gwaz a zo war an douar ne dalvez ket eun taol botez. Hag ar merhed a zo falloh c'hoaz.

**Lom**

Homañ ne raio ket peoh ? Ma ne vefe ket bet ar homiser amañ, hag... an tad maro, war an oaled, ne vefen ket bet pell o krenna deoh ho fri, plahig.

**Gaid**

Sellit 'ta ! Hemañ a gred dezañ dija eo deut da vestr. N'eo ket eet an tad en douar c'hoaz, Lom, hag a-raog ma yelo, marteze e vo red gweled...

**Lom**

Gweled petra, beg toull ?

**Lagadeg**

Ta, ta, ta ! Arabad eo en em zebri. Strafuillet oh ho-tri, gouzoud a ran, gand an darvoud a zo c'hoarvezet hirio, med na gollit ket ho penn. Ezomm em-eus ouzoh evid gouzoud penaoz eo... Lom, neuze e oah o tistrei deuz ar park gand eur harrad melchon. Ped eur e oa ?

**Lom**

War-dro deg eur, n'on ket evid lavared gwelloc'h. War ar mêz, n'emaer ket atao o selled ouz an eur, e-giz er hêriou. Ni a ra deuz an heol.

**Lagadeg**

Feiz sur. Med abaoe tri devez n'eo ket bet gwelet an heol.

**Lom**

Gouzoud a ran demdost deuz an oabl. War-dro deg eur e oa. P'eo bet echu ganin diskarga ar melchon, on deut d'an ti da eva eur banne traou, rag o tarza gand ar zehed e oan.

**Naig**

Atao o tarza gand ar zehed, hennez. Ha n'eo ket dour ar puñs a ziskenn en e gorv, m'hel lavar deoh !

### **Gaid**

Leuskit Lom da gonta ar gaoz, Naig. A-hend-all ne vo ket echu ganeom a-raog mare goro ar zaout.

### **Naig**

Hañ ! Me gav din, bremañ p'eo maro an tad, em-eus aotre da gaozeal en ti mañ, n'em-eus ket ! C'hwi eo ar vestrez ?

### **Lagadeg**

Kendalhit, Lom !

### **Lom**

Netra muioh ! Pa 'm-eus digoret an nor vihan evid dond er gegin, em-eus gwelet, war an taol, an hini koz kouezet a-stok e gorv en tan. Ken e oa devet dezañ e jupenn hag e jiletenn hloan. Med an tan a oa maro. An tad a oa boaz da jom da domma war an oaled penn-da-benn an devez, abaoe ma oa deut re goz evid labourad er parkeier. Da genta, em-eus soñjet e oa bet diskaret an hini koz gand eun taol-gwad, P'on tostaet outañ, avad, em-eus gwelet e oa bet lazet gand eun taol fuzul. Eun hanter-dousenn drajeou e-neus paket en e benn.

### **Lagadeg**

Klasket ho-peus ar fuzul ?

### **Lom**

N'eo ket bet red din klask pell. Ar fuzul a oa stlapet el leh m'emei. Sellit ! War holhed ar gwele-kloz. N'em-eus ket cheñchet plas dezi e mod

ebed. Gouzoud a ran, pa hoarvez eul lazadeg, divennet eo teurel an daouarn war dra pe dra.

**Lagadeg**

Mad ho-peus greet. Ha goude ?

**Lom**

Goude, on eet d'an daoulamm d'ar vourh, da gas kelou d'an ti-kêr.

**Lagadeg**

E peleh e oa ho tiou hoar ?

**Gaid**

Me a oa o soursial deuz ar zaout e Park ar Stankenn.

**Naig**

Ha me am-eus kavet va breur er vourh. Eet e oan da brena traouigou evid an ti, peogwir ar gegin a zo din d'ober.

**Lagadeg**

Mad. Êsoh e vefe bet din ober an enklask ma vefeh bet o labourad asamblez ho-tri p'eo degouezet an taol.

**Lom**

Amañ, pep hini e-neus e labour hag e du. Kuit deom da gaoud fachiri. An traou a ya gweloh, seul nebeutoh en em welom.

**Gaid**

A zo gwir. Pep hini a zo mestr war e labour. Ar zaout a zo war va hont ha ne fell ket din e tostafe den all ebed outo.

### **Naig**

Me a zo mestrez war an ti, penn-da-benn. Ar wazed n'o-deus netra d'ober war-dro an ti. A-walh eo dezo ober al lezenn en diavêz.

### **Lom**

Ober a ran forz gand ho saout pe gand ho ti, loudourenned ! Dre m'on-me mestr war ar marh hag ar stal-labourad-douar, ne houlennan netra muioh. Gand ar merhed n'eus netra da hounid, nemed trouz.

### **Lagadeg**

Mad, mad, mad-tre. Den ouzoh n'e-neus klevet an taol fuzul ?

### **Gaid**

Re bell e oan.

### **Naig**

Me a oa pelloh c'hoaz, koulskoude !

### **Lom**

Evidon-me, tostig a-walh e oan, med an avel ne gase ket war va zu.

### **Lagadeg**

N'ho-peus gwelet den ebed o tostaad ouz an ti ?

### **Lom**

Den ebed. Ne deu ket aliez tud war on tro, amañ. Ouspenn-ze, Kerdreñket a zo anavezet evid beza eun douarenn loened gouez. Ablamour d'ar merhed, ha n'int ket gouest da lakaad eur bannig d'eva nag eun tamm bara da zebri da zen ebed. Hag an hini koz a oa gwasoh c'hoaz.

### **Naig**

Re ger eo ar boued da veza drouziviet.

### **Gaid**

Ha re ger an amzer da veza kollet. Ma rankfem selaou ouz ar baotred, ez afe ar stal ganeom war an douar a-barz pell.

### **Lagadeg**

Da biou eo ar fuzul ?

### **Gaid ha Naig**

Da Lom eo !

### **Lom**

Din-me eo, ya. Med pell 'zo n'em-eus na boled na drajenn ebed da lakaad enni. Re ger, hervez ar merhed-mañ.

### **Lagadeg**

Ma ! a-walh em-eus klevet evid bremañ. Chomit war-dro an ti, ho-tri. Na bellait ket. Me a rank mond d'ober eun dro da weled peb tra. Marteze ez eus chomet eur roud bennag war-lerh an drouglazer. Red eo din ivez gouzoud roudou daouarn piou a zo war koad ar fuzul-mañ. Goude kreizteiz, me a halvo ahanoh, an eil war-lerh egile. Êsoh e vo din selaou pa ne vezoh ket tri o prezeg asamblez.

### **Lom**

Daoust hag e kredit, aotrou komiser, e-nefe unan ouzom lazet an tad ?

### **Lagadeg**

Ne gredan netra ebed. Va micher eo klask. P'am-bo kavet, me a lavaro penaoz, perag ha piou.

### III

*(Goude kreizteiz)*

#### **Gaid**

Perag ho-peus galvet ahanon dirazoh, aotrou komiser. Amzer gollet. Me n'ouzon netra ebed. E Park ar Stankenn emedon gand va zaout.

#### **Lagadeg**

Gouzoud e ran. Hervez pezh a gont an dud, c'hwi, Gaid, a oar mad-tre penaoz ober war-dro al loened-se. Kaerra saout ar barrez eo ho re. Hag amann Kerdreñket eo gwella amann a vez tañvet war an tu-mañ. Bez' e teu marhadourien a-bell d'e brena diganeoh.

#### **Gaid**

*(Lorh enni)*

Klevet ho-peus ? Gwir eo. N'eus maouez ebed par din evid sevel saout hag ober amann mad. Maouez ebed er hanton.

#### **Lagadeg**

Lavaret a zo bet din e peb tu. Koulskoude, abaoe eur miz bennag, n'eo ket ken druz an amann ganeoh, na ken mad al lêz, war feiz tud a zo. Ha treutoh e kaver ho saout ivez, gwir eo ?

#### **Gaid**

Gouzoud a rit an dra-ze ? C'hwi a zo eun diaoul a zen.

#### **Lagadeg**

N'on ket eun diaoul a zen, med va diskouarn a zo digor braz.



### **Gaid**

Spontuz eo. Kaer em-eus ober evel m'on boaz, va zaout a ya da fall ganin. Med n'on ket da veza tamallet evid kemend-se, aotrou. Selaouit mad ! En ti-mañ ez eus unan bennag hag e-neus taolet an droug war va zaout, ya, eur zorserez bennag, pe marteze eul louzaouenn vinimuz da vaga ar hleñved.

### **Lagadeg**

O ! piou a vefe fall a-walh ? Hag ouspenn, c'hwi a zo atao a-dreñv lost ho saout. N'eus nemedoh-c'hwi hag a ra war o zro, n'eo ket gwir ?

### **Gaid**

N'eus nemedon, med e-pad m'emaon o kousked ? Pe pa yan d'an overenn d'ar zul ? Bez' e rankan kuitaad al loened paour a-wechou. N'emaer ket pell o treñka o lêz d'ar zaout. N'eo ket diêz tostaad ouz o neo, p'ema ken tost ar marchosi ouz ar hreñch. Hag hennez a zo troiou en e gorr.

### **Lagadeg**

Hennez ? Piou, hennez ?

### **Gaid**

Ma... An hini e-neus kaset din va zaout da fall.

### **Lagadeg**

A ya ! Med ni a zo amañ o klask gouzoud piou e-neus lazet ho tad, Gaid. N'ho-peus netra nevez da zisklêria din. A-wechou, dre zoñjal, e kaver traouigou bihan, pa deuler evez, hag a zo enno kalz a bouez.

### **Gaid**

Netra nevez, aotrou komiser. D'am meno, ma hellit kavoud piou e-neus

taolet ar fall war va zaout, e vezoh tost da houzoud piou a zo bet digoustiañs a-walh evid laza on tad. Ha marteze n'ema ket pell, hennez. Piou oar !

**Lagadeg**

Me a glasko piz. Gaid. Bremañ, kerzit war-dro ho saout. Red eo din gelver ho preur Lom, da houlenn digantañ...

**Gaid**

Va breur Lom ! N'em-eus lavaret netra diwar-benn va breur Lom. Emichañs ne rannoh grik dezañ deuz ar pezh em-eus kontet deoh.

**Lagadeg**

Ar pezh ho-peus kontet din ?

**Gaid**

Ya. Ar zorserez war ar zaout.

**Lagadeg**

Ar zaout a zo war ho kont, Gaid. Me n'em-eus netra d'ober gand al loened-se. Klask a ran piou e-neus lazetañ an tad.

**Gaid**

Ya, med an hini e-neus lazetañ ar zaout, marteze e-neus ampoezonetañ an tad. Marteze... Forz penaoz, gwanetañ eo bet ganin, d'e dro...

**Lagadeg**

Kenavo, Gaid. Deut eo ar mare da horo ar zaout.

**Gaid**

O ! va Doue, ya. Mond a ran buan.

#### IV

##### **Lagadeg**

Ahanta, Lom, marteze e hellfeh lakaad ahanon war an hent mad.

##### **Lom**

Peseurl hent?

##### **Lagadeg**

Hent ar wirionez : me a rank gouzoud piou e-neus lazet ho tad.

##### **Lom**

Me a garfe gouzoud ivez.

##### **Lagadeg**

N'eus bet gwelet den ebed en-dro da Gerdreñket hirio. Setu...

##### **Lom**

Setu petra ?

##### **Lagadeg**

Setu e ranker anzav n'ez eus nemed ar famill da damall.

##### **Lom**

Hervez ar feson, ya. Ne lavaran ket nann.

##### **Lagadeg**

'M-eus aon ne oa ket kalz a garantez etrezoh hag ho tad.

##### **Lom**

Karantez ebed. An tad a oa eun den droug, eun den kriz. Ma ouifeh, pegement em-eus gouzañvet dindannañ. Nann, n'em-eus keuz ebed dezañ. Med ne vijen ket eet beteg laza va zad. N'eo ket traou d'ober. M'am-befe soñjet laza unan bennag, en ti-mañ, n'eo ket an hini koz am-befe taolet d'an traoñ.

### **Lagadeg**

Ma komprenan mad, ar c'hoarezed a zo gwasoh c'hoaz eged an tad ?

### **Lom**

Pa vez mad ar merhed, war an douar-mañ, n'eus gwaz ganet ebed gouest da veza gwelloc'h egeto. Med, p'en em lakaont da veza fall, n'eus diaoul ebed en ivern hag a vefe treh dezo. E-giz-se ema an traou.

### **Lagadeg**

Ahanta, arabad mond re stard ganto. Marteze n'int ket ken mad, na ken fall. Ma vefe goulennet diganin, me a jomfe etre daou.

### **Lom**

Selaouit, aotrou komiser. Ober a ran va labour gwella ma hellan. Abaoe eo deut an tad re goz, n'eus nemedon oh ober al labouriou tenn. N'on ket bet gouest da zimezi. Piou ar plah yaouank he-defe asantet dond amañ, en douarenn ouez-mañ. Setu on chomet en toull, da vaga an diou skragneg, bouetet treud ganto hag o vond e pillou e-pad m'emaint o vernia skoejou en armel. Mad ! Ma ne vefent bet nemed skragn, c'hoaz ! N'ouzoh ket petra a zo bet greet din, nevez 'zo ? Eun dachennad avalou-douar am-oa hadet, eur ouenn avalou-douar dibabet. Warhoaz e raio pemzegteiz abaoe em-eus greet al labour-ze. Ma ! tri pe bevar devez war-lerh, em-eus kavet an dachenn freuzet, troet ha distroet gand ar varr e-pad an noz, taolet din an hadenn war an dachenn, drouzivet va labour. Gwasoh c'hoaz ! Disul,

p'on deut d'ar gêr deuz an overenn, em-eus kavet va marh, er marchosi, leun a wad war e fri. Skuillet e oa bet dezañ tammou gwer e-touez e gerh.

N'ouzon ket penaoz eo bet fur a-walh al loen paour da jom heb debri tamm beteg distro e vestr. Paneve-ze e oa echu gantañ.

### **Lagadeg**

Arsa ! N'eo ket êz beva asamblez, er memez ti, pa n'ez eus santimant vad ebed etrezoh. M'hen goar mad, ar vrasa enebourien a vez kavet e-touez an dud memez gwad. Ha piou e-neus lazet an tad, Lom ?

### **Lom**

N'eo ket me. Gouzoud a ran petra zoñjit : Lom e-neus tennet eun taol fuzul war e dad ablamour e-neus tamallet dezañ freuzadeg an dachenn avalou-douar hag an taol fall greet d'e varh. N'ema ket ar wirionez ganeoh. Ha perag ? Ablamour an tad, ken gouez ha ma oa, n'e-nefe klasket gwinta din va marh evid mad ebed. Biskoaz n'e-nefe greet droug d'eur marh. Gand ar zaout ne ree ket forz, med ne oa ket gouest da houzañv al loened askelleg, ar helien, ar gwenan, al lapoused. N'ouzon ket perag. Med evid ar hezeg, ar roñsed, e-noa kalon dener kement ha ma helle. Hag evid gwez e liorz. A-hend-all...

### **Lagadeg**

Kement-se ne ziskouez ket din perag eo bet lazet. C'hwi, Lom, a lavar e oah o troha melchon. Med n'oh bet gwelet gand den. C'hwi ho-peus kavet ar horv, hag e oah hoh-unan kaer. Ar fuzul a zo deoh, ouspenn.

### **Lom**

Gouzoud mad a ran. Ha koulskoude n'em-eus ket lazet an tad.

### **Lagadeg**

Neuze e rank beza ho c'hoar Gaid.

**Lom**

Va hoar Gaid ? Ha perag ?

**Lagadeg**

Feiz, soñjit ta ! Gaid, war a lavar, a oa o tiwall he saout e Park ar Stankenn. Med piou e-neus gwelet Gaid e Park ar Stankenn ? Den beo ebed. E-leh ho c'hoar Naig, toullet he-deus kaoz, er vourh, gand eun hanter-dousenn komerezed, dres d'an eur m'eo bet diskaret an tad.

**Lom**

Gaid, n'eo ket posubl. Honnez he-deus kollet eun hanter euz he furnez. N'eo ket sod da staga, med tost. Gwir eo, ar re zod a zo gouest da laza, a-wechou. Med Gaid, gand ar brasa c'hoant, n'he-defe ket gellet ober netra vad gand eur fuzul. An dra-ze ouzon mad. M'ho-pefe lavaret din Naig, ya. Honnez a zo eur plah fin, dornet mad ha gouest d'ober he zroiou dre zindan. Eun droug-spered gwisket gand eul lostenn. Med peogwir e oa hi er vourh, ne gomprenan netra ebed. Nann, netra.

**Lagadeg**

Ma ! Lom, bez' e hellit mond d'ho labour, bremañ. Me a jomo amañ beteg am-bo diskoulmet ar gudenn-ze.

**Lom**

*(o vond kuit*

Ma n'eo ket Naig, n'eo den ebed.

**V**

**Lagadeg**

Naig, c'hwi eo ar yaouanka euz ar vugale, n'oh ket ?

**Naig**

Eo. Petra ra an oad en afer-mañ ?

**Lagadeg**

Boaz, an tad a gar atao muioh an hini diweza euz e vugale, dreist-oll p'eo deut pell war-lerh ar re-all.

**Naig**

An tad, amañ, ne gare den ebed. Me ne oan ket tostoh dezañ eged an daou-all. N'eo ket me am-eus lazet anezañ, koulskoude, peogwir e oan er vourh, c'hwi oar mad.

**Lagadeg**

Ne lavaran netra. Ne ran nemed klask.

**Naig**

Klaskit, klaskit ! Ne ran forz ebed ha pa gavfeh pe ne gavfeh ket. An tad a zo maro, Doue da bardono d'an hini e-neus reñket dezañ e stal. Mad a zo greet dezañ, ya. Eun den garo e oa, eun den kriz evel na vez gwelet nebleh. Bez' e hellan lavared kement-se, peogwir n'on ket da veza tamallet, dre ma oan er vourh, dres p'eo c'hoarvezet an taol. Hag on bet gwelet gand teir dousenn a dud. On tad a oa falla den a zo bet ganet biskoaz war an douar-mañ, atao o klask ober droug. Selaouit ! Me am-oa plijadur vraz gand va gwenan. Teir holoenn em-oa, em liorz dirag an ti. Desket em-oa o doare ha mad-dreist e kaven ar mel. Ma ! pevar devez zo, em-eus kavet va gwenan mouget en o lochennou. Stanket e oa bet warno. goude beza taolet er goloenn eur seurt louzou-apotiker en eur vuretenn.

**Lagadeg**

Hag e tamallit an torfed-se d'ho tad ?

**Naig**

Da biou all ? An tad ne oa ket gouest da houzañv al loened askelleg. Seiz gwech warn-ugent e-noa mennet din e-nefe distrujet va gwenan. Kavet e-neus e du gand al louzou divalo-ze. Rag ne oa ket gouest d'ober d'ar gwenan pezh a ree d'al lapoused.

**Lagadeg**

Petra ree d'al lapoused ?

**Naig**

Petra ? Bezh tro pa wele eul lapous bennag war eur wezenn pe eun dachenn, e taole eur mên warnañ. Ha ral an dro ma ne oa ket tizet al loenig paour. Eur valtam gom a veze gantañ aliez ivez, med kentoh e c'hoarie gand eun taol mên. E lagad a oa lemm hag e zorn eeun spontuz da deurel mein. Med koulskoude, evid laza eur wenanenn e oa paket berr.

**Lagadeg**

Trugarez deoh. Naig. A-walh em-eus klevet. Bremañ ouzon piou e-neus lazeta an tad, ha penaoz ha perag.

**Naig**

N'eo ket posubl ! War eun taol, e-giz-se ?

**Lagadeg**

War eun taol-krenn eo deut din ar wirionez. O ! Lousouarn ! Gwivarh ! Kerzit da glask din Gaid ha Lom ! Buan !

**VI**



### **Lagadeg**

Setu eo deut ar mare, va zud, da zisklêria doare an droug-laz a zo c'hoarvezet hirio e Kerdreñket. Med marteze e rafen mad, a-raog displega penaoz eo eet an hini koz da anaon, konta deoh eun nebeud traou diwar ho penn hoh-unan, kement ha m'emaoh amañ.

### **Lom**

Dalhit ho kaoziou ganeoh, mar plij. Re bell 'zo en em anavezom etrezom, siwaz !

### **Lagadeg**

Ha koulskoude oh faziet an eil war egile, ha setu perag eo maro an hini koz.

### **Gaid**

Faziet ? Ma zo faziet unan bennag n'eo ket me.

### **Lagadeg**

C'hwi koulz hag ar re all. Selaout, ma kontin deoh pezh a zo bet e Kerdreñket abaoe eur miz. Ne vin ket pell.

Da genta, c'hwi a zo faziet, Gaid ar Zaout. Ya, c'hwi. Ho saout o-deus kollet eun hanter euz o lêz ha blaz o amann ablamour int bet gwanet gand ar hleñved. Eur hleñved boutin a-walh, ha n'eo da veza tamallet da zen ebed.

### **Gaid**

Sorserez, ya, me oar gwelloc'h egedoh, paotr.

### **Lagadeg**

Marteze. Med ar medisin loened a oar gwelloc'h egedoh. Ha lavaret e-

neus din dioustu, ar mintin-mañ. Hogen, c'hwi ho-peus tamallet ar hleñved-se d'ho preur Lom. Hag oh eet, da noz, da freuza dezañ e barkad avalou douar. Hag ho-peus taolet tammou gwer draillet e neo e varh.

### **Lom**

C'hwi 'ni oa, sah ludu, tamm-teil, sodez da staga !

### **Lagadeg**

Peoh ! C'hwi a zo faziet ivez, Lom Kerdreñket, peogwir ho-peus kredet e oa bet ho c'hoar Naig war-dro ho touar hag ho marh. E-leh kastiza Gaid, ho-peus mouget gwenan Naig gand louzou ar vuretenn-mañ.

### **Naig**

Va gwenan, Lom ! C'hwi a bako diganin-me, bezit asur !

### **Lagadeg**

C'hoariet fall ho-peus, Naig, ne welit ket, bremañ ? N'eo ket an hini koz e-neus distrujet deoh ho kwenan. Ha koulskoude ho-peus greet eun dra hag e-neus kounnaret ho tad spontuz.

### **Naig**

Me ? N'em-eus greet netra ebed !

### **Lagadeg**

Eo. Deh d'abardaez, pe marteze en noz mañ, ho-peus heskennet ar gwez per a zo bet plantet nevez 'zo gand ho tad. Eun taol heskenn da bep hini, tre d'an traoñ, e leh m'eo kuzet an dreujenn gand ar geot. N'eo ket a-walh da ziskar ar gwez, med a-walh eo da lakaad anezo da zizeha prim. Na lavarit ket nann : kavet em-eus an heskenn er geuneudeg, hag ar brenn gwez per a zo chomet warni.

**Lom**

Penaoz ho-peus dizoloet kemend-all a draou ken buan ?

**Lagadeg**

C'hwi ho-tri ho-peus disklêriet din eun hanter euz ar wirionez. N'eo ket bet diêz din c'hwesa an hanter all.

**Lom**

Mad, memez tra. Med piou e-neus lazet an hini koz, neuze ?

**Lagadeg**

Gaid, kerzit da furchal en dillad gwele, war-du ar speurenn, e leh ma oa ar fuzul. Eur mên a gavoh a-dreñv ar holhed. Ahanta !

**Gaid**

Ya. Ema ganin. Eur mênig ront ha rust. Petra eo ?

**Lagadeg**

Ar mên-ze e-neus lazet ho tad. Ha setu penaoz : an hini koz a zo bet fuloret broust pa 'n-eus kavet e wez per heskennet ha kondaonet da zizeha. Kemend a zroug du a zo eet ennañ m'e-neus soñjet en em laza e-unan en doare ma kouezfe warnoh ho-tri an tamall euz e varo. Gourvezet e-neus e fuzul war holhed e wele, eur gartouchenn e-barz. Eet eo da azeza war an oaled, dres dirag ar fuzul. Ha neuze, gand ar mên mañ, e neus tizet ar hi ha paket dioustu an drajeou en e benn. Setu. Hervez al lezenn, ne hellan teurel hini ebed ouzoh en toull. Ho tad a zo maro evid netra. E gwirionez, avad, eo bet lazet ganeoh ho-tri. Ha bremañ kenavo ! Pres braz a zo warnon da vond kuit deuz an ti mañ.